

編號 3 號

【家鄉个名產】朱淑琴原作

車仔行過鬧熱个都市，來到好山好水个莊下。白白个雲在天頂游啊游仔，青里里个田連到山腳下，風涼沁涼沁，一陣陣个青草味鑽落鼻空，這就係个家鄉——臺灣个長壽村「關西」。講著關西，就會分人想著有名个「仙草」咧！

阿公、阿婆戴在關西，阿公係煞猛个耕種人，屋下也有種仙草。嫩嫩幼幼个仙草，葉仔細細皮、有絨毛，矮矮仔無幾高，一大遍仙草田，差毋多半年就做得收成，割下來再過放在禾埕晒，晒到乾燥，就做得煮來吃。

「阿公，該草仰安到仙草呢？」細細該下，當好問支柄來擊<sup>1</sup>个倔緊問阿公。阿公就摻佢講：「頭擺人做田事、行山路，日頭上煎下焮<sup>2</sup>，晒到頭暈腦脹懶拐拐仔，恁堵好！毋知麼儕好心煮仙草茶來分大家食，大家咁了毋單淨毋會熱著！還嘎精神起來，斯講該怕係仙人送草來个哦！還有一種講法：仙草茶煮一鑊，摻兜太白粉攙攙仔，鮮鮮个變糯糯咧，看起來當大鑊，斯講，該怕係

<sup>1</sup> 問支柄來擊：音 mun` gi` biang` loi kia；打破砂鍋問到底。

<sup>2</sup> 上煎下焮：音 shong` zien` ha` bed；形容烈日當空非常炎熱。

仙人來變个！所以『仙草』也安到『仙人掌』。」

仙草晒燥來焮水，清涼解毒人人愛。一埕仙草剝剝仔，加兜冰砵、摻兜糖，軟軟滑滑透心涼！日頭烈烈个熱天，食仙草最退火；冷天時節，寒風咁咁滾，冷到嚟嚟掣，一碗燒仙草，加紅豆、綠豆膠地豆，無斯芋圓、粉圓、細板圓共下食，燒氣衝天，食到笑連連！滑溜个仙草，對喉嚨頭溜到肚屎肚，燒暖个感覺七流到歸膺身，實在還享受哦！

仙草也做得做鹹个料理，阿婆用仙草來燉土雞仔，加兜紅棗、枸杞落去，烏金烏金个雞湯，有特別錫人个味緒，看著口水就落落跌！這仙草雞湯分人補身體、有元氣，佢見擺都食到舐嘴撮鼻<sup>3</sup>！

時代緊進步，仙草經過千年百載無分人擢忒，顛倒還較受人歡迎！傳統市場、超級市場，全有佢个身影。這下，最時行个手搖飲料店，仙草乳茶長透賣到淨淨、空空！去到關西名產店，唉哦！還有即溶仙草粉、仙草麵條、仙草茶箍哦！

「一寸土地一寸情，千金難買故鄉情。」仙草毋單淨係客家人愛，還較係大家都知个好名產。實在講：天地精華在這草町<sup>4</sup>，清涼補肝又退火，冷燒鹹甜滋味好，關西仙草最係寶！想到家鄉个名產，佢就感覺歡喜又光榮啊！

<sup>3</sup> 舐嘴撮鼻：音 she` zhoi` liab` pi`；食物美味讓人意猶未盡。

<sup>4</sup> 草町：音 co` nen`；草裡。